

GOVERNMENT PRESS SECRETARIAT

MINISTRY OF THE PRIME MINISTER & CABINET

Level 4 FMFMII Government Building
Eleele-fou i Matagialalua, Apia, SAMOA
P: +685 26397/ 24799 ext 747
E: lave.tuiletufuga@mpmc.gov.ws
dikaosune.atoa@mpmc.gov.ws
pressoffice@mpmc.gov.ws



Faatauto le Faamasino Sili o le Faamasinoga

Tusia: Asenati Taugasolo Semu

SAVALI; O le agaga o le faafetai na faaleo e le Afioga i le Faamasino Sili, Satiu Leatigagaono Miti Simativa Perese i le sauniga o le faatautoga o lona tofiga fou i le taeao nei.

O le sauniga o le faatautoga na faataunuuna i le Maota o le Ao Mamalu o le Malo i Vailele, e le Ao Mamalu o le Malo, Tuimalealiifano Vaaletoa Sualauvi.

O le Akiepiikopo ia Alapati Mataeliga na faapaiaina lenei sauniga ma ia faamanuia ai i le Afioga i le Faamasino Sili.

“O le loto faafetai tele, ou te momoli atu i lau afioga i le Ao mamalu o le Malo Samoa, Lau Afioga Tuiaana Tuimalealiifano Vaaletoa Sualauvi. Lau Afioga i le Palemia Tuilaepa Aiono Malielegaoi, lau afioga i le Fofoga Fetalai, le mamalu o le Palemene ma le Kapeneta,” na saunoa ai le Faamasino Sili.

“O le aso ma le filiga, o le aso foi ma le māta’igatila. ‘O lea ua ia te a’u le loto maulalo ou te tautino atu ai, ‘ua ou talia le tofiga ua outou faaee mai, ia fesoasoani mai le Atua ia te au.

“O le tofi o le Faamasino sili ua tofia iai a’u i le asō, ou te talitonu ma le atoatoa, o le tofi e auauna mo tagata uma. E ui lava a tāua le tofi, ae e iai le manatu, po o leā le tāua e le tofi, e sili na tāua le fa’amaoni.”

Na faaleo foi le faafetai a Satiu i lona aiga, aemaise o le faailoa ai o le tua’a o lona tina, o Te’o Tuvale lea na umia le tulaga o le Fa’amasino Sili tau Mataupu o Fanua ma Suafa i Samoa i le 1896, i le taimi o pulega a Siamani.

Na faatumulia le sauniga i le taeao nei lea na auai le mamalu o le Malo i ona tulaga mamalu eseese, faapea sui o Malo mai fafo aemaise o aiga ma uo a le Afioga i le Faamasino Sili.

Na faailoa foi le agaga faafetai o Satiu i le Afioga ia Patu Tiavaasue Falefatu Sapolu, lea na tauaveina le tofiga Faamasino Sili, na malolo litaea mai ai i le tausaga ua mavae.

O le Afioga ia Satiu ua silia ma le 30 tausaga o galue o se Loia i totonu o Niu sila, ma e umia faailoga Loia Maualuluga mai le Iunivesite o Columbia i Niu Ioka faapea ma le Iunivesite o Victoria i Ueligitone i Niu Sila, ma e tele nisi faailoga ma tofiga maualuluga o lo o ia umia.

Na amata aoaoga a Satiu i le Aoga Tulagalua a Magiagi ma faaauau atu ai i aoga maualuluga ma Iunivesite i Niu Sila ma atunuu i fafo.

O lona tama o Satiu Fea Leasuasu Perese of Salimu, Fagaloa ma lona tina o Ulufafo Samau o Tanugamanono.

Ua 58 nei tausaga o lona soifua, ma e to’alua ona alo.

